

## In po d'météo avu Gaston

Nord	La Bîje.
Nord-Est	La Hiôte Bîjr
Est	Solê l'vant
Sud-est	
	Lôrin.ne
Sud	Midi
Sud-Ouest	France
Ouest	France
Nord-Ouest	Skwâtche vê.

Lu Pépé du Nôrd astot Djean-Bijon, in p'tit vî tout ratortiyî ki n'avot jamwês frèd.

Sa seûle buzougne ére du choufler la fine nîve p'âs trôs des hayes, pou bouchî les vôyes et les t'chmins, à f'jant des sconsires. Cand les afants astint mèchants, il arivot vite choufler et hoûler dins la tchminée. Avu loû, toute ène bande du ptits lutins, les « Pinçerons » ki v'nint pinçi les mwins, les dôyes et les orèyes. Pa des côps, is vnint dul' hiôte û dul' nwâre bîje et is pinçint co pu fwârt, mês nin longtimps. Cand le vent v'not dul' gare de Djèdine avu les djibouléyes du mars, il ârot sckwatchi (écorché) les djon.nes vês è les bèdots k'on v'not d' tonde.

Cand les walées vunint d'Hodrémont, ill'su pârtint souvint d'zeus les Raymonts et Bîve n'avot rin; mais si iles passint oûte, chûr ku la tounoûre alot tumer su les mâjons.

Cand lu vant est à Lôrin.ne, c'est signe de plûve certin.ne.

On dit ku çu n'est nin la djalée ki fwêt lu pu d' mâ âs fleurs, c' est putot lu solê ki grèye les fleurs adjalées.

On dit ossi ku blantche djalée dumande à z'awè lu cu r'lavé; c'è don signe du plûve.

Les walées les pu méchantes vunat de bîje û don bin conte lu vant.

On dit ku la tounoûre tume 95 côps su 100 dins l'êwe.

On dit k' la tounoure fwêt rater les couvées.

C'è ène walée à tounoûre ki marque les sêsons, ki sèpare l' iviêr d' avu l' esté.

I parèt ku les walées du canicule amon.nat pu d'tounoûre ku les ôtes.

Les canicules, c'è 15 djoûs d'avant è 15 djoûs après.(on n'sé jamwês kand ça c'mince è kand ça finit)

On pu s'garanti du l' tounoûre:

1. à f'jant in signe du crwâs, kand il alume.
2. à z'alumant lu cierje, bèni à l'chand'leûr.
3. à priant St Donat.
4. à pindant s'n'imådje dins les stâles.
5. à pikant ène pâkète dins les môyes.
6. à s'mètant d'zous ène blantche supine.
7. à f'jant du feu ki fume fwârt.
8. à s'sâvant des grands âbes et des ustyîes an fiêr.
9. A apêchant les courants d'êr dins les mâjons.

A l'esté, les luweurs k'on wèt à l'nute au lon, sont in signe du tchaleur. C'est des alumwâres du tchaleur.(sourlouter)

Ou moumint des djiboulées, on dit du solê, k'il a r'tchâfe co yène.

On dit k'à çu sêson-là, cand lu solê tchâfe trop fwârt, k'i gn'è k' à l'sugrignî, pou k'i s'cathe lu rèsse dul' djournée.

On dit ku la lumire du l'lune fwêt toûrner à rin lu tchèrbon k' è à l'uche.

On dit ku l'timps ki r'prind avu la lune dère ostant k'lîe.

I gn'a avot ki d'jint ku l'avant d'France astot l'mèyeu des engrais.

On dit k'i fât ku l'avant tume avu yâk.

On a raconte co bin des ôtes, mês c'est pou ène ôte còp.